

K928.441
6

關中水道記

K92



關 中 水 道 記

孫 彤 撰

編主五雲王

編初成集書叢

關 中 水 道 記

中華民國二十五年十二月初版

朱

撰 者

孫

彤

發行人

王 雲 五
上海河南路

印刷所

商務印書館
上海河南路

發行所

商務印書館
上海及各埠

關中水道記卷一

清 承德孫 彤撰

河水

河水自塞外東流至廢勝州西。屈南入塞。逕陝西榆林府府谷縣東。水經河水東過雲中楨陵縣南。又東過沙南縣北。從縣東屈南過沙陵縣西。卽于此也。漢沙南境在今縣東北。唐置河濱縣。元和郡縣志。河濱縣。黃河在縣東一十五步。闊一里。不通船楫。卽河濱關是矣。河水又南。河東則山西河曲縣也。黃甫川水東南注之。水自塞外牛武城南流。逕黃甫營邊牆入口。又南入于河。河水又南。清水川東南注之。水自塞外野麻灣逕清水營邊牆入口。右合石山水溝水。又東南逕塔兒山。西入于河。按通典。榆林有金河。紫塞河。自馬邑郡善陽縣界流入。唐榆林境勝州在今縣北。則清水卽金河。石子溝水疑亦紫塞河也。河水又南。河東則山西保德州也。孤山水南注之。水出塞外。九河合流。又南入塞。右合桑溝水。孤山水又東南。左合木瓜河水。水亦出塞外南流。逕木瓜園西。又南入于孤山水。河水又西南。右得石馬川水。又西南。逕神木縣東南屈野川水。自塞外來注之。元豐九域志。連谷銀城二縣皆有屈野川者也。河水又南。入葭州界。彌勒河水自神木縣來東注之。南宋置彌勒砦于此。水受其名矣。河水又南。圍水東注之。今謂之禿尾河也。河水又南。寧河水東南注之。按山海經。號山。端水出焉。而東流注于河。水經注以爲在此。今水出州北八十里。王元溝南流。左合寧河塞水。歷山谷中。逕州境。北入于河也。河水又南。逕州境東。河東則山西臨

縣也。諸次水自榆林縣來東南入之。其水亦名茹蘆水也。河水又南。右得神泉水。水在州西十五里。河水又東。烏河水東入之。水出州西六十里。河水又南。湯水東注之。俗稱黑水坑者也。水出綏德州米脂縣桃花峽。行數十里。其水落于崖下爲深澗。黑色。至州南入河。按山海經。上申之山上無草木而多磬石。下多檉枯。湯水出焉。東流注于河。水經注以爲在此。則米脂縣北諸山當卽上申山。俗有白雲山。馮家山之目也。河水又南。入綏德州吳堡縣界。河東則山西永寧州也。又南。水灘溝水東注之。水在縣北十里。二泉交流入河水。河水又南。逕縣境東。相公泉水東注之。河水又南。落楊溝水東注之。次南。馬跑泉水出縣西北二十五里南流。東注之。俗云。宋將楊滿堂經此。馬渴泉出。因以名焉。其水清冷。亦名清河也。河水又南。逕綏德州東。又南。逕清澗縣界。生水東南注之。水經注謂之奢延水。唐爲之無定河也。水經注。河水又南。逕離石縣西。奢延水注之。今永寧州卽離石境也。河水又南。河東則山西石樓縣也。又南。逕延安府延川縣東。河東則山西永和縣也。辱水自安塞縣來。東入焉。水經注。河水右納辱水。俗謂之秀延水者也。河水又南。入宜川縣界。水自安塞縣來。東注之。水經注。高奴縣河水右會區水。世謂之清水。今俗謂之濯斤河也。河水又經石槽。元和郡縣志。河岸頓狹。狀似槽形。人呼爲石槽。蓋禹鑿石導流之處。今俗名爲石澗也。河水又逕孟門山。水經注。孟門卽龍山之上口是也。案山海經稱凌門之山河出其中。卽謂此矣。凌龍聲相近。所謂龍門。道元疑山海經所言爲域外之山。何其謬也。黑水自甘泉縣來。東注之。水經注。河水又南。合黑水。黑水東南流。右會定水。元和郡縣志之庫利川也。今俗謂之洛川水。河水又南。河東則山西吉州

也。蒲川水合丹陽川北注之。水經注之蒲水。今俗謂之仕望川也。河水又南。白水注之。水經注。河水又南。合蒲水。又南。丹水東北會白水口。丹水又東北入于河。是亦與丹水通流也。河水又南。河清川水東北注之。水出同州府韓城縣朱砂嶺。案水經注。河水于此有黑水。出丹山東而東北入河。疑卽此水也。其水清激。未詳黑水之目矣。河水又南。入同州府韓城縣治戶川東注之。水經注。河水又南。至嵎谷傍。河水又南。洛水自獵山枝分東派。東南注于河。昔魏文侯築館河陰。指謂是也。今治戶川疑卽是水也。水經注云。是洛水枝分。所未詳矣。今俗謂此水爲錯開河。云伯鯨治河。不由水性。是有其名。其類齊東之語矣。河水又南。河東則山西河津縣也。暢水出縣西北。朱沙嶺東注之。水經注。右合暢谷水。卽于此也。今俗謂之盤水。河水又南。逕縣境東。河東則山西榮河縣也。南谷水東注之。水出縣西北蘇山也。河水又南。潞水東入之。水經注謂之峒谷水。太平寰宇記謂之峒谷水也。河水又南。入郃陽縣界。百良河水東南注之。水出縣北新莊邨也。河水又南。河東則山西臨晉縣也。徐水出梁山東南注之。俗名橋頭河也。河水又逕子夏石室東。俗謂之飛浮山。案金史地理志則謂之非山也。河水又南。剗首水出焉。春秋傳。秦敗晉于令狐。至于剗首。通典。郃陽有剗水。太平寰宇記亦名郃陽有剗首坑也。剗首水又名陽班。唐書地理志言貞元四年。剗剗谷水成矣。河水又南。入朝邑縣界。河東則山西蒲州也。郃水自郃陽來。東南注之。水亦漢水也。河水又南。逕縣境東。河東則山西永濟縣也。又南與洛水會。又逕華陰縣東北。渭水西來入之。河水于此亦名楊旴。竹書穆天子傳。稱天子西征。驚行至于楊紆之山。河伯馮夷之所居都。淮南子。禹以身解于楊旴之

汧高誘曰楊旴河在秦地山海經中極之淵深三百仞惟馮夷都焉張守節按魚龍河圖亦云馮夷陰潼鄉隄首人河伯之都其在此矣縣故有祠封禪書云河祠臨晉括地志云大河祠在同州朝邑縣南三十里祠于魏大統中又立四瀆祠于廟廷周天和中宇文護于此建碑唐封靈源公者也今遺基存焉河水又南屈東入潼關廳界楊家河水注之河水又東逕廳境北灌水北來注之述征記謂之潼谷水元和郡縣志又謂之潼水也山海經言此水入渭今入河蓋潼關華陰河渭之會互得通稱矣河水又東源望溝水北注之水出劉果山也河水又經黃巷坂北潘岳西征賦沂黃巷以濟潼在此矣水經注言歷北出東嶠通謂之函谷關也自坂以西南則皆桃林之數本夸父之連麓矣河水又東入河南閩鄉縣界逕河南山東江南三省又北出于海

屈野川水

屈野川水出陝西榆林府神木縣北塞外元豐九域志連谷銀城二縣皆有屈野川今連谷故城在縣北邊外水出塞地五蘭窮兒東南流入襄城右合老龍泉水水在縣西北十五里屈野川又東南逕縣境西芹河東入焉水出塞外東南流逕筆架山南入于屈野川山在縣西三里本名駝兒山明武宗駐蹕之所名也屈野川又東南左得泗滄河水水自永興堡來西流逕縣南入于屈野川屈野川又東南右得柏油河水水東西二源俱出柏油堡境外南流入邊逕柏油堡合關王窮水又東南入于屈野川屈野川又東南柏林河水東南入焉水自縣西南五十里柏林堡來也屈野川又東南長澗川西南注之水在縣東六

十里導原沙溝。世亦謂之燕子谷川也。其水入屈野川。屈野川又南入于河。

圖水秃尾河

圖水出陝西榆林府葭州塞外。地理志上郡白土。圖水出西。東入河。水經注。圖水出上郡白土縣。圖谷。隋書地理志。開光有圖水。顏師古漢書注。今有銀州銀水。卽是舊名。名猶存。但字變耳。今漢白土境在州北塞外。其水二源俱導。一爲蘇麻河。一爲惡水河。蘇麻河水東經石城子南。案水經注言圖水東經其縣南。疑卽白土故城也。其水又南入塞。左合神銜水。水出神木縣柏林堡塞外。俗名永利渠。按水經注言神銜水出縣南銜山。出峽東至長城。入于圖。則是此水也。銜山當在塞外。今失其名耳。神銜水入長城。左與一水合。水出神木縣西水洞鋪。合流。又西南入葭州界。逕高家堡北。又西入于圖水。圖水又東南。疾藜川水東注之。水出建安堡東也。圖水又逕三角城東。開光川水東南注之。水經注。圖水又東逕鴻門縣。又東。梁泉水注之。水出西北梁谷。東南流注圖水。今水出州北黑龍潭。潭去州百二十里。俗謂之開光川。卽水經注之梁水也。後周于此置開光郡。因以名焉。隋始縣之。州西北亦其境也。圖水又東南入于河。水經注。圖水逕圖陰北。又有桑谷水出西北桑谿。東北注圖水。今無水也。通典。銀州理榆林在圖水之陰。唐地理志。銀州東北有無定河。或言唐人以圖水卽無定河。然考水經注。無定河。圖水是二水也。今神木縣是漢圖陽境。葭州是漢圖陰境。水在神木縣南葭州北。其爲圖水無疑矣。俗種此水爲秃尾河。志家亦多以爲圖水也。圖訇正字。圖譌字。銀假音字也。

諸次水茹蘆水

諸次水出陝西榆林府境北塞外。山海經諸次之山諸次之水出焉。水經注水出上郡諸次山。其水東逕榆林塞。世又謂之榆林山。卽漢書所謂榆林舊塞者也。今水出府東雙山堡西北塞外。諸次之山疑在其地。俗失其名也。水亦名茹蘆水。元和郡縣志真鄉縣茹蘆水源出縣西北太平寰宇記言真鄉縣茹蘆水源出縣西平地。真鄉故志在今府境東葭州境。卽此水。其水東南流入葭州界。右合關家川水。水在州西北百三十里。按水經云諸次水東入長城小榆水合焉。水卽關家川也。諸次水又東南真鄉川東南注之。水在州西北百里。按水經注諸次水又東合首積水。水西出首積谿。疑卽此水也。周置真鄉郡于州北。因以名焉。諸次水又東南五里川東南注之。水出州北百二十里姬家畔。東南流歷落珠厓清風寺。南與金明寺水合。又東南至州西北入于諸次水。諸次水又南逕州境西屈東逕州境南入于河。

生水奢延水 朔水

生水出陝西延安府靖邊縣東。山海經孟山生水出焉。水經注謂之奢延水。云西出奢延縣西南赤沙阜東北流。洛川在南。俗因縣土謂之奢延水。又謂之朔水。元和郡縣志朔方縣無定河一名朔水。一名奢延。水源出縣南百步。今縣東北塞外是朔方故境也。水經注言水出奢延縣西南奢延故城在廢夏州西南。今縣東懷遠縣亦其地也。有水出縣東酸茨溝。俗名滉忽都河。疑卽生水之源。水東箭竿嶺。或卽孟山。非所詳矣。其水東北流。苕麥河合紅柳河。自靖邊縣東來合之。水出靖邊縣東南十里苕麥城下北流。逕縣

境東又北左合紅柳河水水自寧塞堡逕范老關西又東逕縣北與莪麥河合莪麥河又東北出邊逕鎮羅堡北又東入塞逕鎮靜堡北又東至龍州堡西入于生水或以爲生水別源按山海經孟山西二百五十里曰白於之山洛水出于其陽東流注于渭水夾水出于其陰東流注于生水夾水當卽紅柳莪麥水也今靖邊縣南有白路山疑卽白於之譌洛水出其南此水出其東北是合山海經之說矣生水合夾水東北流出長城至清平堡入塞逕榆林府懷遠縣界清平水北注之又東柳兒泉北注之又東狄青原水北注之皆在懷遠縣西生水又東海棠河東西二河俱出鎮靖堡塞外東南注之按水經注奢延水東北與溫泉合疑卽是水也生水又東逕懷遠縣境北又東黑水東南注之水經注黑水出奢延縣黑澗東南歷沙陵注奢延水元和郡縣志朔方縣烏水出縣黑澗東注奢延水本名黑水太平寰宇記烏水源出縣北平地亦契吳之麓今水在武威堡北塞外俗稱石穴羔水東南流北則打狼河亦自塞外東南來注焉合流又南入于生水昔赫連勃勃築統萬城于奢延水北在黑水之南卽此水也生水之北又有一水南會焉志家以爲圓水按水經注奢延水又東合交蘭水水出龜茲交蘭谷東南流注于奢延水當卽是也龜茲故城在榆林縣北亦縣東北境矣生水屈南一水東北注之水出縣南東北流逕五龍山至鮑家寺合寺子溝水又至響水堡北入于生水俗稱黑木頭河按水經注奢延水又東北流與鏡波水合水源出南邪山南谷東北流注于奢延水當卽此水也邪山亦當在縣境今失其故名矣志家以黑木頭河爲卽水經注之交蘭水其水南流此水北注非佳證矣生水又東南逕榆林縣界又東南至嗣武城山帝原水

來會焉。今俗謂之西河也。水經注。奢延水又東。逕膚施縣。帝原水東南注奢延水。卽此。今綏德州古膚施縣境。榆林懷遠之南界。亦其地也。生水又南入綏德州米脂縣界。又南背于川。自葭州西入之。又南逕縣境。西飲馬水西注之。水出縣北。西南流。合米脂水。水出縣東張家山。西流逕縣南。入于飲馬河。水合流。又西注于生水。生水又西南入綏德州界。又東南逕州境北。大力川北注之。水卽平水也。水經注。膚施縣又有平水出西北平谿。東南注奢延水。隋書地里志。大斌縣有平水。大斌故城在州境。太平寰宇記。綏州廢龍泉縣州西。有大力川。廢大斌縣。有小力川。並在邑界。今水出懷遠縣西南橫山。疑卽太平寰宇記之大力川也。其水東流。北合小力川水。水出清平堡東老虎塢。疑卽太平寰宇記之小力川也。其水東南與大力川合。又東至米脂縣。西北入于生水。今俗亦稱大理河。小理河。方輿勝覽。大理水在綏州。神宗朝神譔復綏州。夜渡大理水。駐師。理力聲之緩急也。生水又東。逕鳴咽泉北。唐胡曾之所賦矣。又東走馬水。自安定縣來北注之。俗名懷寧河也。生水又東。滿堂川南注之。俗云宋將楊滿堂屯兵于此。遂以名川矣。生水又南。逕清澗縣東北。白羊谿水北注之。水出縣東吐谷嶺。水經注。白羊水出于西南。白羊谿循谿東北注于奢延水。卽是水也。唐時以吐谷渾部族僑治州界。是有其名。其水又東北入于生水。俗譌稱此爲白家河也。生水又東南入于河。

帝原水西河

帝原水出陝西榆林府榆林縣西北塞外。地理志。膚施有帝原水。水經注。帝原水西北出龜茲縣東南流。

今龜茲故城在縣北。水出塞外胡盧海。俗名西河也。其水南流合漳河水。水出常樂堡西注帝原水。帝原水又南流入塞。逕紅石峽。其水衝厓南下。陡落數仞。西則片河入焉。水出塞北。有湖曲依山勢。佳饒片操。因有是名。片河水合小沙河。又東入塞。注于帝原水。帝原水又南逕府境西東。則鍾家溝水西注之。次南劉指揮川西注之。西則與柳河合焉。帝原水又南右得黑水河。水在縣西南五十里。東南流入帝原水。帝原水又南與奢延水會。水經注云。自下亦爲通稱也。

走馬水懷寧河

走馬水出陝西延安府安定縣北高柏山。後漢書段熲傳。熲追羌出橋門至走馬水。水經注。膚施縣走馬水出西南長城北陽周縣故城南橋山。今水出高柏山。俗名懷寧河也。山在縣北八十里。水經注云。上有黃帝冢。攷地里志。陽周橋山在南。有黃帝冢。張守節按括地志及元和郡縣志皆云。黃帝陵在寧州羅川縣東八十里子午山。隋羅川唐改眞寧。李吉甫云。是漢陽周地。今爲慶陽府眞寧縣。則黃帝冢當在甘肅。自漢以來皆言是矣。而酈道元以橋山爲在此。又說走馬水出陽周縣故城南。則陽周故境又在懷遠安定之間。志家相承亦云。安定縣北九十里。有陽周故城。二說東西懸隔。中阻諸水。非所詳矣。橋山今俗云在中部非也。走馬水又東右合一水。又東逕綏德州清澗縣北。黑水自延安府安定縣來東南注之。水出安定縣北黑水堡西也。走馬水又東北入綏德州界。又逕州境東。又東北入于生水。

辱水秀延水吐延川

辱水出陝西延安府安塞縣北西山。經申山北二百里曰鳥山。辱水出焉。而東流注于河。穆天子傳已西天子飲于澠水之上。水經注。辱水俗謂之秀延水。元和郡縣志謂之吐延川。云延川縣取吐延川爲名。吐延水北自綏州綏德縣流入。今水出安塞縣北王家掌。東北流入安定縣界。逕秦重嶺北。澠水北注之。嶺在縣西南三十里。疑卽鳥山也。澠出水嶺西北。俗稱麻兒河。按水經注。秀延水東流得澠水口。旁谿西轉窮谿。便卽澠水之源。則此水也。今俗以爲麻兒河也。辱水又東于叉川水東南入之。水出于叉山。山在縣西五里。東北流合黑牛川水。又東逕堡子山北。南入辱水。辱水又東逕縣境北。又東李家川北注之。水在縣南三十里。按水經注。辱水又東會根水。西南谿下根水所發。而東北注辱水。當卽此水。俗名李家川也。辱水又東。革班堡水南注之。辱水又東入綏德州清澗縣界。又東南西河水出縣北官山南注之。辱水又南逕縣境西。又東南河出縣東吐谷嶺北。會目宿嶺水西南流。又西逕縣境南入于辱水。辱水又南黑龍溝水首受永平川東南注之。永平川水出延安府安定縣東南黑山。俗名郝家川。東南流入延川縣界。又東左合樓兒河水。水亦出安定界。又名白津川也。其水至延川縣界入于永平川水。永平川水又東入清澗縣界。合于黑龍溝。其水又東南入于辱水。按元和郡縣志。城平縣。後魏孝明帝于今縣理西三十里。庫仁川置城平縣。隋自庫仁川移于今理。攷唐城平縣東北至綏州一百里。則故境當在縣境西南。知庫仁川卽永平川也。辱水又南入延安府延川縣界。站水東注之。水出縣西禪梯嶺。東經縣境北入于辱水。辱水又南逕縣境東南。河水東注之。水出縣西宮道山也。辱水又東南交口川水東注之。水出延長縣西北。

亦名高家原水。東南流。逕獨戰山南。太平寰宇記。延安縣獨戰山在縣北四十五里。山高峻險。一人獨戰。可以當千。是有其名也。其水又東南入延川縣界。合于辱水。辱水又東入于河。

區水清水 去斤水 延水

區水出陝西延安府安塞縣北蘆關嶺西山。經罷父山百七十里曰申山。區水出焉。而東流注于河。水經注。區水世謂之清水。東流入上郡長城。逕老人山下。又東北流至老人谷旁。水北出。極谿便得水原。隋書地理志。金明縣有清水。故城在北元和郡縣志。膚施縣清水俗名去斤水。北自金明縣界流入。鮮卑謂清水爲去筋。太平寰宇記。謂之濯斤水。云昔日尸毗王於此水中濯其筋骨。故名。今水出蘆關嶺。嶺北屬靖邊縣。南去縣百五十里。當卽山海經所謂申山也。區水出而南流。逕縣境西。又南入膚施縣界。渾州川水自安塞縣來東注之。太平寰宇記。金明縣渾州川水在縣西二十里。自閣門府來。至縣西。今水出靖邊縣南牛頭坡。南流。逕杏子城。入保安縣界。俗稱杏子河。又稱園林川。又東南入安塞縣界。俗稱西川水。東南流。右與龍尾水會。水經注。龍尾水出北地神泉障北山。龍尾谿。太平寰宇記。膚施縣龍尾水出郡北龍尾谿。故名。是也。俗亦稱小平川水。東南注于渾州川水。渾州川水又東南至膚施縣北。入于區水。區水又南。逕縣境東。右則柳湖合。南河水北注焉。水經注。清水又東。會三湖水。水出南山湖谷。當卽此也。柳湖東北合南河水。水出縣南亞支山。北流。左合牡丹川水。水自縣西南牡丹山東北流注之。合流。又北。會柳湖入于區水。按地理志。高奴有洧水。肥可醢。水經注。謂之豐林水。云清水又東。逕高奴縣。合豐林水。豐林川長津。

瀉注北流會清水。漢高奴今安塞縣。膚施亦其東境。洧水疑卽南河及牡丹川也。元和郡縣志則云清水卽地里志之洧水。非所詳矣。區水屈東。烏邪谷水南注之。水出烏邪谷。按水經注。奚水西出奚川。東南流入清水。邪奚聲相近。疑卽奚谷水也。區水又東。青化水自安定縣來南注之。太平寰宇記。豐林縣。青化水在縣東北四十三里。自嘉泉東流入瀧筋河。嘉泉者。耆老云。水湧出飛流一丈似圖礮。可嘉。因以名之。今水出安定縣南鴉鵲嶺。俗名潘陵川。南流。一水自東來合之。俗名南塔水。東逕蟠龍鎮。東入青化水。青化水又西南入膚施縣界。又西南入于區水。區水又東入延長縣界。關子口川東北注之。水出縣西南甘泉縣界也。區水又東逕縣境南。漱玉泉水南注之。區水又東南。安溝河水東注之。水出縣南叉口。東流逕安溝鎮南。又東入于區水。區水又東入宜川縣界。逕重覆山北。又東南入于河。

黑水庫利川 汾川水

黑水出陝西延安府甘泉縣東九谷溝。水經注。黑水出定陽縣西山。二源奇發。同瀉一壑。今水自縣東東流。又南右合一水。水經注所謂二源是其一也。俗稱馬市川水。合流又東逕臨真鎮。鎮故魏臨真縣。唐宋因之。元和郡縣志謂此水爲庫利川。云昔有奴賊居此。川內嵇胡呼奴爲庫利。因以爲名。太平寰宇記云。臨真縣庫利川在縣北一十五里者也。初學記。按水經注謂之烏川水。云源出汾川縣西北。按道元以此爲黑水。而徐堅所引水經注乃號烏川。詳其縣名亦是隋唐所置。知道元之外別有書矣。其水又東入宜川縣界北。縣北則漢定陽故境也。應劭注。縣在定水之陽。水經注亦云。定陽縣黑水逕其縣北。又東流。右

合定水俗謂之白水。水西出其縣南山定水谷。今是水之南無水以應之。疑定水亦黑水之名矣。黑水又東。逕殺狗嶺南。樂史按水經云。汾川縣西有殺狗嶺者也。黑水又東。逕汾川鎮南。鎮故縣境矣。黑水又東入于河。俗謂黑水曰汾川水者也。太平寰宇記云。宜川縣庫禍川合丹陽川。庫禍卽庫利之譌。其云合丹陽川誤也。

蒲水 銀川 丹陽川

蒲水出陝西延安府宜川縣西。水經注。蒲水西則兩源並發俱導。一山出西河陰山縣。初學記。太平寰宇記。按水經注曰。蒲水南自鄜州洛川縣流入丹陽川。今水出鄜州晉師山。山東北去宜川縣百里。世傳晉文公駐師于此。俗名此水爲銀川。金史地理志云。洛川有圓水。卽此也。攷書傳則是蒲水也。其水東流逕縣境北。又東。長松水北注之。水經注。陰山東麓南水。東北與長松水合。水西出丹陽山東。東北流。左入蒲水。元和郡縣志謂之丹陽川。云汾州魏廢帝改爲丹州。因丹陽川爲名。太平寰宇記。宜川縣。丹陽川在縣西南。今水出鄜州洛川縣北界牌山。東北流入縣西南境。又東。一水西北注之。水出神道嶺。俗名南川水。亦曰赤石川也。按元和郡縣志。丹州永徽二年移于赤石川口。太平寰宇記云。在縣西北。今此水在縣南。赤石之名。志家之所誣矣。長松水又北。逕縣境東入于蒲水。蒲水又東。左合仕望川水。按水經注。蒲水又東北。與北谿會同爲一川。東北注河。則是此水俗名仕望川也。水出甘泉縣東界。東流逕縣北。公字山。南合于蒲水。或說仕望川卽赤石川。水經注。又有赤水出罷谷山。東謂之赤石川。太平寰宇記。宜川縣赤水。

川在縣西北二里。闊三百步。從西延州臨真縣界流入。是此水已然。按水經注。赤石川與蒲水各自入河。赤石川入河。又在蒲水之北。疑此水今竭也。志家說蒲水長松水。西谿水多誤。今依書傳攷正焉。又水經注云。蒲水出西河陰山縣。知鄜州西北宜川之西。是漢陰山境。陰山縣以山名。故地形志云。敷城縣有女陰山。維川亦魏敷城地。疑晉師山卽陰山也。志家不言漢陰山。值今何縣地。亦不詳地形志。女陰山所在也。

暢谷水盤水

暢谷水。出陝西同州府韓城縣西北梁山。水經注。暢谷水自谿東南流。逕夏陽縣西北。今水出朱沙嶺。嶺亦梁山也。去縣百二十里。俗稱盤水也。東流。逕柏林洞南。右合煖水。暢谷水又東。屈南。文水東北來會焉。水出縣西北文家嶺南。東流至開元寺前。合于暢谷水。暢谷水又東南入于河。

湑水瀨水

湑水。出陝西同州府韓城縣西北梁山。水經注。夏陽縣。崕谷水出縣西北梁山。東南流。太平寰宇記謂之崕谷水。今謂之瀨水。湑崕聲之緩急。湑瀨字皆俗作也。說文解字有湑水。是此水矣。水出縣西北梁山。俗名其嶺曰麻線嶺。嶺去縣百二十里。其水東南流。右合白馬灘水。其水二源俱發于梁山。合流東注。湑水。湑水又東南。離水自洛川界來東注之。湑水又東。谷水南注之。水出朱沙嶺南。湑水又東。左合瀘水。湑水又東。逕舊韓城北。又東。屈南。逕縣境西南。又東。澗水東入焉。按水經注。橫谿水出三畧山。又東。逕夏陽縣。